

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

Januar 2023

von Helen Alba

## E Baurehochzeit frieher

E Baurehochzeit war frieher e großes Ereignis im Dorf, die Hochzeitseltre han es Beschti aus Kich un Keller de Gäscht serviert. Manchmol hat so e Hochzeit phaar Täch lang anghal un es ware bis zu 200 Gäscht ingelad. Do hat sich doch niemande lumpe losse wille un wann mer noch so vill schufte hat misse un hundsmied war. Drei Wuche vor der Trauung hat de Pharre noh der Predich jede Sunntach es Brautphaar ausgeruft. In manchi Ortschafte war des Ereignis aach an der Eingangstier zur Kerch angekündicht. Mancherorts sin Braut un Breitigam heekschtperseenlich, anerorts zwaa grossi Buwe, die Gäscht zur Hochzeit inlade gang.

Un schnell war de große Tach angerickt. Schun friehmorjets han die Jugendliche im Wertshaus die Tische gericht, es Gscherr beigetraa un de Saal ufgeputzt. Großi Kessle ware ufgstsell, die Hochzeitskechin hat mit ihre Helferinne beizeite anfang misse. Nit in jeder Ortschaft war es Hochzeitsesse es gleichi. Ich kann nor vun Bogarosch saan, dass dorte erscht korzes Rindspaprikasch uf de Tisch kumm is, dernoh Bradl, Krumperpiree un Saures/Dunschtofst, gfilltes Kraut, Tortne un kleeni Mehlspeis un geger Morjet die sauri Supp.

Nohmittachs han sich die vum Breitigam aus geladne Gäscht in dem seim Elterschhaus versammelt un sin vun dorte die Braut abholle gang, bei der sich schon ihre geladni Gäscht versammelt ghat han. Iwerall is Kuche un Wein angetraa gin, die Blechmusik hat ufgspillt un de Hochzeitszuch is zur Kerch maschiert. Noh der Trauung is es wieder zruckzus ins Brauthaus gang. Es sin Bäckkipfle angetraa gin, derzu han alli Wein un Tschitro getrunk. Geger Owet sin alli Gäscht mitm Brautphaar ins Wertshaus gspillt un es Esse is ufgtraa gin.

Geger Mitternacht sin die Verkleedne kumm. Des ware die Arweitskullegre vun de Brauteltre, die vill Jux ufgfiehrt han. Sie han ihre Esse noh dem Gaudi in Kaandle gfillt kriet un bei eem Verkleedne derhem sich des dann gut schmecke gelosst. Morjets war die Hochzeit rum, es Brautphaar is mitm Schubkarre hemgfiehr gin.

## E Hochzeit heitzutach

Ja, des is jetzer ganz annerscht mit dem Heirate. Mer lebt schun gudi Zeit vorher als Partner mitnaner, um sich besser kennezerne. Un wann mer sich gewiss is, dass es funkzioniere werd, git gheirat. Jedenfalls muss mer sich in der Stadt wenschtens e Johr vorher zu dem Schritt entschliesse un de Saal in eem Restaurant reserviere. Anzahle muss mer ach e Teel. In der Zwischenzeit tut mer sich es Brautkleid aussuche, intressiert sich, wuhin die Hochzeitsreise gehn soll un sucht sich es Modell vun der Brauttortn aus. Die Einladunge gin ach schon Wuche vorher gedrukt un verschickt oder ausgeteelt, weil diejeniche, die ins Restaurant zur Hochzeit kumme, misse ihre Derbeisin bstätiche, dass mer weess, wievill Porzione vorbereitet gin misse.

Un bei so eener Hochzeit ware mer in dem Summer. Im Restaurant war alles nowl hergericht. Des Lokal hat e große Garte ghat, wu die Gäscht sich die ganzi Nacht im Freije ufhalte han kenne, wann se Luft schnappe han wille. In eener Losche war e Stand mit eener Obstausstellung, in e anrer e Tisch mit allerlei Kuche. Akar wann mer Gusta verspiert hat, hat mer sich bediene kenne. Ich stallier schun wieder. Es Obst war zwar wunerscheen hergericht un arranschiert, hat awer ke Gschmack ghat.

Die Vorspeis war e kalti Platte mit allerhand Salami, Käs, Obst, gfillte Paradeis (mit Vinetesalat) un Paprika (mit Käs gfillt). Dernoh is de sogenennte „Eingang“ serviert gin. Des war Fisch mit Gemiese. Derzwische hat mer tanze kenne. Ufmol is es gfillti Kraut mit Mamaliga un dorchwaxtem Speck ufgetraa gin, zwaa Stunde dernoh die sauri Supp. Weit noh Mitternacht is es Bradl kumm un erscht geger Morjet die Brauttortn. Geger finf Uhr sin Braut in Breitigam in e Auto ingstie, dort ware hine lauter leeri Dosne angebunn. Dass es scheppert, wann se uf Hochzeitsreise fahre.